

Vun driweriwer

erscheint auf www.lenauheim.de

monatliche
Erscheinung

Juli 2023

von *Helen Alba*

Kipfle mit Attichleckwar

Es war an eem scheene, sunniche Junitach. Die BÄsl Bewi hat vill in der Stadt rum laafe misse. Schun zeitich is se ufgstann, hat awer nor e Stickl trucke Brot ins Maul gstopp un e Tippl Tee getrunk. Nodem se schun so manches in dere Stadt erledicht ghat is, hat se mächtige Hunger vergspiert. Na denkt se, ich wer mer e Kipfl kaafe, des reicht dann bis zum Mittachesse. Gsaat un gemacht. Sie geht mit dere Kipfl grad iwers Trajans-Platz un beisst mit gutem Appetitt nin, do gsieht se die BÄsl Mari uf sich druf zukumme. Bal hätt se sich iwerm Griesse verschlickt. Un schun froots Mari: „Na Bewi, tuscht du heit in der Stadt esse?“ Was tuscht dann do mit so gutem Appetit verzehre?“ „Es is nor e leeri Kipfl!“ „Kumm e Stickl weiter, do kriet mer in eener Kondi was Gutes! Leckwarkipfl. Un nit akar welchi, sie sin mit Attichschmier!“

Sie kaafe sich alli zwaa so e Kipfl, verzähle e Weilche un jeder geht sei Wech weiter. Es Bewi schmunzelt noch immer so vor sich hin, weger dem In-der-Stadt-esse, un denkt sich: na ja, e Ewichkeit is schun vergang, seider ich nimi mit meim Alde so wirklich in die Stadt, also in e Restaurant esse gang sin. Mir han anri Sorche genuch un leichte uns des nimi so, wie mer des in jungi Johre gar oft gemacht han.

Die Zeit is wie im Nu vergang, die BÄsl Bewi hat gschau dass se hemkummt un de Tippe iewerstellt. Es war Mehltach, un bis se die Schuppnudle fertig ghat hat, des hat schun sei Zeit gebraucht. Nodem se mit ihrem Mann gess hat, han se sich bissl ausruhe wille. Also nit ins Bett leije, nor so ufm Sessl bissl limmle. Sie han gered, was se so alles an sellem Tach erledicht han. Ufmol froot de Martin: „Des war alles, was dascht heit gemacht hascht? Sunscht nix?“ Die BÄsl Bewi hat ihre Mann angeblinzelt un schelmisch gsaat: „Ja, bal hätt ich jo vergesst for der saan, ich han heit in der Stadt gess!“ De Martin schaut se schief vun der Seit an un froot: „Ohne mich?!“ Wie er awer gheert hat, vun was die Red is, un dass es sich nor um Kipfle ghandelt hat, eeni sogar mit Attichleckwar, hat ach de Vetter Martin lache misse.

Wann die Aue tripse

Es Gerda un ich, mir sin schun mitnaner in die Obeda und noher in die Schul gang. Schun frieher han mer mitnaner gspillt, später kann ich mich erinnre, wie mer schun in der Stadt in die Schul gang sin, (es Gerda in Lippa un ich in Temeschwar) sin ich immer in de Ferien zum Gerda seiner Oma, sie hat Liebesromane gammelt. Die sin vor villi Johre als Fortsetzung in der Zeitung erschien un die Lissi Oma hat des alles ausgschnied un zammgebündelt ghat.

So sin die Johre ins Land gezoo, jetz sin mer alli zwaa nimi die Jingschte. Doch mir telefoniere geere owets mitnaner un verzähle vun dem een oder anre. So a doneilich. Un ufmol ments Gerda, des wäe doch was for die Pipatsch. Es hat sich erinnert un verzählt:

„Ich muss selmols schun in der Schul gewenn sin, weil ich kann mich ganz gut dran erinnre. Es war im Friejhjohr un mei Mami hat gement, ich sellt mol uf die Hutwed naus laafe un noh de Gänsle schau. Ich han des geere gemacht, weil ich immer noch was anres betracht han derbei: wie die Wolke laafe, vun wu de Wind blost, wie schnell es Gras wachse tut. Un beim Zruckzus hats mich am Au irgendwie gschenniert, des hat zu laafe anfang. Ich han es Sacktiechl rausghol un ans Au ghob. Vun der anri Seit gsieht es Walleth Lissi, dass ich am Au heppe tu un ruft a schun: `Gerda, kumm doch riwer, was hepscht dann?!` Un wie ich em verzähl, dass mei Au tripse tut, saats Lissi a schun: `Des sin beesi Hoor!` Ens zwaa han ich ufm Hockl ghuckt, es Lissi hat mit eener Pinsettn rumgfigert, hat mer es Auelid nuf un nuner gezoo. Un die Prozedur vun selmols, die han ich mei Leptach nimi vergesse kenne. Sogar heit dreht sich mer de Maa rum, wann ich nor dran denke tu. Ich han mei Lewe lang a niemols mei Auebraue zuppe kenne. Immer han ich an die beese Hoor vun selmols denke misse“.